

## SCHÄFFEROTSERKLÄRUNG FIR 2011-2017

Dir Häre Schäffen,

Madame an Dir Häre Conseilleren,

Léif Matbiergerinnen a Matbierger,

1770 Wieler aus onser Gemeng hunn sech un de Wahle vum 9. Oktober 2011 bedeelegt a bestëmmt, wat fir Kandidaten an Zukunft de Gemengerot solle besetzen.

23% vun de wahlberechtigten Net-Lëtzebuurger hunn um demokratesche Prozess deelgeholl.

Déi 4 Parteien déi ugetruede woren hunn dës Resultater erreecht:

CSV	14,37 %	1 Sëtz
LSAP	29,25 %	3 Sëtz
DP	30,51 %	4 Sëtz
Schëtter Bierger	25,87 %	3 Sëtz

D'DP an d'Schëtter Bierger hu jeeeweils ee Sëtz derbäigewonnen . Si hunn eng nei Koalitioun gebilt, déi mat iwwer 56 % vun de Stëmme a 7 Sëtz vun 11 demokratesch voll legitiméiert ass.

Den 10. November 2011 huet den Inneminister Jean-Marie Halsdorf deen neie Schäfferot vereedelegt, an den 21. November 2011 hutt Dir 8 Conseilleren am Kader vun enger öffentlecher Zeremonie den Eed als nei Membere vum Schëtter Gemengerot ofgeluecht.

Dir hutt geschwuer, Är Aufgabe mat « zèle, exactitude, intégrité an impartialité » an am Respekt mat der Verfassung an de Gesetzer vun eisem Land ze erfëllen.

Ech felicitéieren Iech, a wënschen Iech vill Gléck a Satisfaktioun an Ärer neier Fonctioun. Ech hoffen, am Numm vun de Kollege vum Schäfferot a vum Personal, dass mer am Gemengerot eng fair, efficace a loyal Zesummenaarbecht kréien. De Schäfferot bitt Iech op alle Fall déi Zesummenaarbecht un. Mir sinn dankbar fir all positiv Kritiken. Mäin Appel geet un Iech alleguerten, trotz geleeëntleche politeschen Divergenzen, e respektvollen Ëmgank mam politesche Konkurrent ze fleegen. D'Privatliewe vun de Mandatéierte gehéiert net an déi politesch Ausenanersetzung.

Am Schäfferot deele mir ons d'Aarbecht esou op:

- **Buergermeeschter** : Nicolas Welsch  
Verwaltung a Kommunikatioun,  
Gemengenentwécklung,  
Baugenehmegungen,  
Verkéier an Transport,  
Finanzen (zesumme mam 1. Schäffen)
- **1. Schäffen**: Jean-Paul Jost:  
Schoulwiesen,  
Betreiung vun de Kanner,  
Ëmwelt,  
Bauten,  
Finanzen (zesumme mam Buergermeeschter)
- **2. Schäffen** : Jean-Pierre Kauffmann  
Veräiner, Sport, Jugend,  
Kultur a Kult,  
Gemenge Gebäier,  
Relatioune mam 3. Alter,  
Relatioune mam CIPA a mam Syrdallheim

Ech wëll ervirhiewen, dass dem Schäffen- a Gemengerot seng Aarbecht nëmme Friichte kann droen, wann se an Ofstëmmung mam Personal geschitt, deem seng héich Kompetenz a seng Motivatioun e wichtegt Kapital vun onser Gemeng sinn.

Dir Dammen an Hären,

Déi 2 Delegatioune vun de Schëtter Bierger an der Demokratescher Partei hunn sech op e Koalitiounsaccord geeenegt, dee sech an dëser Schäfferotserklärung erëmispigelt.

Si hunn sech fir d'Mandatsperiod 2011-2017 domadder dës politesch Zieler gesat:

## ENTWÉCKLUNG VUN DER GEMENG

Haut wunnen an der Gemeng Schëtter dräimol méi Leit ewéi 1970. D'Awunnerzuel ass an deeër Zäit méi séier gewuess ewéi déi an den Nopeschgemengen, beispillsweis Sandweiler, Nidderaanwen a Conter. An am landeswäite Verglach sinn an der Gemeng Schëtter iwwerduerchschnëttlech vill Aarbechtsplazen entstan.

Mat senger gudder Lag am Anzuchsgebitt vun der Stad, sengen dynameschen Entrepen a senger ausgezeechenter Liewensqualitéit bleift d'Gemeng Schëtter eng attraktiv Plaz fir de Wunnengsbau an nei Handwierks- an Handelsbetriber. D'Demande no bezuelbare Wunnengen ass héich, d'Offer muss am Intressi vun de jonke Stéit mat der Nofro Schrëtt halen. Dobäi däerf een awer d'Erhale vun den natierleche Ressourcen op kee Fall aus den Ae verléieren.

No intensiver Berodung mat de Bierger hat de Gemengerot am Joer 2003 eestëmmeg e Gemengenentwécklungsplang gestëmmt. Dodra war ënnert anerem festgeschriwwen ginn, datt Schëtter eng Gemeng mat ländlechem Charakter bleiwe misst an datt bis 2015 d'Zuel vun den Awunner net iwwer 3 800- 3900 erausgoe sollt. Haut si mir bei 3 550 Awunner ukomm.

Duerfir wäerte mir:

- d'Ziel vun engem moderaten Awunnerwuesstem am Sënn vum Gemengenentwécklungsplang vun 2003 (deen awer muss ugepasst ginn) weiderverfollegen;
- den neien Flächennutzungsplang (PAG) an engem oppenen Dialog an an Zesummenaarbecht mat de Bierger a Biergerinnen vun der Gemeng ausschaffen;
- dee säit enger Rei vu Joren geplangte Projet "soziale Wunnengsbau op Leyebierg" sou séier wéi méiglech ëmsetzen an am Intressi vun de jonke Matbierger weider, no Bedarf, Projeten ugoen;
- dat betreit Wunnen doheem fërderen;
- altersgerecht Wunnenge schafen;
- d'Bebauung op manner sensibele Flächen konzentréieren an esou déi natierlech Ressource schounen an erhalen;
- déi Grondstécker am Parc d'activité Syrdall, déi nach fräi sinn, enger Bebauung zouféieren.

## VERKÉIER

All Woch passéieren Dag fir Dag ongeféier 11. 000 motoriséiert Gefierer eis Gemeng – an de Spëtzestonnen mueres an owes ongeféier all fënnf Sekonnen eent – iwwer d'Joer ronn 3,5 Milliounen Gefierer!

Et gött ëmmer méi schlëmm: Kaméidi, Ofgasen, Filterstëbs, Vibratiounen an net zulescht Verkéiersaccidenter – dat alles ass vun Dag zu Dag manner z'erdroen.

Vill Fahrten duerch eis Gemeng gehéieren op d'Verkéisersachs „Oste vum Land – Rond-Point Sandweiler – Kierchbiërg“. Si ass awer iwverlaascht. Et staut dacks. Duerfir huele vill Automobilisten d'Achs „Éiter – Schraasseg – Schëtter – Minsbech – Kierchbiërg“.

Mir wëllen zesumme mat alle politesche Parteien an de betraffene Bierger de Problem „Duerchgangsverkéier“ an der Gemeng Schëtter méi staark wéi bis elo regional an national thematiséieren, Argumenter zesummestellen a Léisungsvirschléi entwéckelen, fir un d'Regierung erunzotrieden, fir datt eng Verbesserung vun der Situatioun fonnt gëtt.

Duerfir wäerte mir :

- eng Luftschedstoffstudie an Optrag ginn, fir déi negativ Auswierkunge vum Verkéier op d'Gesondheet vun den Urainer vun den Hauptverkéisersachsen ze dokumentéieren;
- op Basis vun de Resultater vun deeër Etude d'Regierung opfuerderen, d'Kapazitéit an d'Leeschungsfäegkeet vun der Verkéisersachs „Oste vum Land –Verdeelerkrees Sandweiler –Kierchbiërg“ ze verbesseren souwéi d'Méiglechkeet vun enger wäittraimeger regionaler Emgéihung z'ënnersichen;
- ons fir de Bau vun engem Zuchsarrêt an der Industriezon zu Minsbech an zu Schraasseg asetzen, fir op déi Manéier den éffentleche Persouneverkéier z'ënnerstëtzen;
- kuerzfristeg Verkéisersberouegungsmoosnamen ëmsetzen, an dat als alleréischt virum Schoulzenter zu Minsbech;
- ons fir eng "shared space"-Zon am Zentrum vu Schëtter a Minsbech asetzen;
- d'Netz vu Vëlos- a Spadséierweeër an onser Gemeng ausbauen;
- de Schülertransport optiméieren an derfir suergen, dass Schraasseg besser bedéngt gëtt;
- „Pedibuslinien“ aféieren, op deenen d'Kanner, déi an engem Radius vu manner ewéi 900 m vun der Schoul eweg wunnen, a Begleedung vun Erwuessenen zu Fouss an d'Schoul goe kënnen;
- déi Verbindungen am Trottoirnetz bauen, déi nach feelen, ewéi z.B zu Minsbech bei der Autobunn, an der rue de Senningen zu Neihaischen oder tëscht Schraasseg a Schëtter;
- d'Betribler am Gewerbegebitt opfuerderen, hire Mataarbechter déi Parkplazen, déi do sinn, zu akzeptabele Bedéngungen zur Verfügung ze stellen;
- e Fousgänger- a Vëloswee tëscht Minsbech-Gare an dem Parc d'Activité Syrdall uleeën;
- bei der Gare zu Minsbech eng Vëlosverwahrstatioun bauen, soudass Zuchsbenotzer vun hei aus mat hirem eegene Vëlo op d'Aarbecht oder heem kënnen fueren, wat an der heiteger Zäit vun den Elektrovëloen ëmmer méi Sënn mécht;
- e Verkéisers- a Sécherheetskonzepit fir de Campus scolaire ausschaffen an ëmsetzen;
- keen iwverméissegen Zousatzverkéier zu Iwwersiren schafen duerch d'Uleeën vun enger Industriezon oder d'Verlagerung vun Aktivitéite vun der Gemeng;
- déi Bushaisercher bauen, déi nach feelen, wéi z.B zu Schëtter (Kräizgaass) an zu Neihaischen;

- drop halen dass de Verbuert vum Transitverkéier vun iwver 3,5 t duerch ons Gemeng strikt agehaale get;
- d'Signalisatioun an der Gemeng a besonnesch fir déi öffentlech Plazen a Gebäier verbessern.

## ËMWELT

Ons Gemeng ass eng Klimabündnisgemeng a muss dofir vill méi geziilt den CO<sup>2</sup>-Ausstouss senken, den Energiekonsum an domat d'Ëmweltbelaaschtung bremsen.

### Duerfir wäerte mir :

- de Bierger eng professionell Berodung fir d'energetesch Optimiséierung vun hirem Eegenheem an/oder fir d'Benutzen vun alternativen Energiequellen (Sonnekollektoren, Fotovoltaik, Äerdwäermt) zum groussen Deel finanzéieren ;
- als Gemeng mam gudden Beispill virgoen an ons Gebaier energetesch sanéieren an esou vill wéi méiglech alternativ Energiequelle benotzen. Duerfir realiséiere mir kuerzfristeg en Energie-Effizienzplang. Domat gëtt iwverall an der Gemeng vill Energie gespuert an d'Energiekäschten, déi ëmmer méi héich ginn an déi de Bierger mat bezilt, ginn op d'Dauer erof ;
- beim Bau vun öffentleche Gebaier nohalteg an ökologesch Baumaterialie benotzen
- Flächen ewéi den Daach vun der neier Sportshal fir d'Solarenergie notzen ;
- beim Erschlësse vun zukünftege Wunnengsbau-Projeten global an nei Energiekonzepter fërderen a realiséieren (Nidderegenergie- oder Passivhauser, Fernwäermt, optimal Orientéierung vun den Hauser, intelligent Stroossebeliichtung, ënnert anerem mat LED-Liichtkierper) ;
- a verschiddene Beräicher eng Virreiderroll iwverhuelen an esou zum Beispill elektresch bedriwwe Gefierer fir d'Gemeng kafen, a sondéieren, ob genuch Interessi do wär fir eng „Solartankstel“ze bauen;
- all Méiglechkeeten ausschäffen fir d'Verpeschte vun der Loft, d'Liichtverschmutzung an d'Stralebelaaschtung ze reduzéieren;
- Initiativen ewéi Biogasanlage gekoppelt mat Fernwäermt oder anerer Energieverwäertung ënnerstëtzen ;
- de Klimapakt mam Staat sou séier wéi méiglech ënnerschreiwen;
- bei neie Baugebidder/Lotissementer drop oppassen, dass ökologesch gebaut gëtt, keng Plaz verbëtz gëtt an dem Naturschutz en héije Stelleväert zoukënn;
- bei zukünftegen Bauprojeten grouesse Wäert op Gréngs an onse Wunngebiddere leeën an entsprechend Oploe festschreiwen;
- fir ze verhënneren, dass d'Syr an d'Birelerbaach verschmotzt ginn, eng Entrevue bei der Regierung froen an ons fir eng rapid Ëmsetzung vun de Moosnamen asetzen, déi am Gesetz vun 2004 am Kader vun der d'Ofwaasserbewirtschaftung vum Fluchhaff virgesi sinn an och errechen, dass d'Kläranlag zu Iwwersiren ausgebaut gëtt. Bei dëser Operatioun mussen d'Interesse vun onser Gemeng respektéiert ginn.

- déi lokal Landwirtschaftsbetriber ënnerstëtzen an deem mer souweit ët méiglech ass op hir lokal Produkter an ob hier Mathëllef am Interessi vum Schutz vun der Ëmwelt zreckgreifen;
- schoulesch a pädagogesch Programmer an Zesummenaarbecht mam Schoulpersonal ausschaffen an esou bei de Schüler d'Bewosstsinn fir d'Bedeutung vun der Ëmwelt a vun der Landwirtschaft stäerken;
- an de Gemengebetriber prioritär ëmweltfrëndlech Produkter verwennen, sou vill wéi méiglech op Pestizide verzichten, bei Fester regional an nohalteg produzéiert Liewensmëttel servéieren;
- bei der Offallwirtschaft op Vermeidung vun Offall setzen, well de Recycling kascht och wäertvoll Ressourcen, a grouss Deeler vum produzéierten Offall kéinte liicht evitéiert ginn.
- och a Saache Solidaritéit mat de Länner aus der 3. Welt wäerte mir eis Verantwortung iwerhuelen, Projet'en am Süden ënnerstëtzen, a souweit wéi méiglech fair gehandelt Wueren an eise Servicer gebrauchen.

## ENG BESSER INFORMATIOUN,

## TRANSPARENZ AN ÉIERLECHKEET AN DER POLITESCHER PRAXIS

Mir bestinn op eng kloer Trennung zwëschent de Partikularintressien an dem öffentliche Interessi sou ewéi op eng äusserst strikt Uwendung vum Artikel 20 vum Gemengesetz, deen dat hei seet:

*Art. 20. Il est interdit à tout membre du corps communal, au secrétaire et receveur: 1° d'être présent aux délibérations du conseil communal et du collège des bourgmestre et échevins sur des objets auxquels il a un intérêt direct, soit personnellement, soit comme chargé d'affaires ou fondé de pouvoir ou auxquels ses parents ou alliés jusqu'au troisième degré inclusivement ont un intérêt personnel et direct. Cette interdiction s'applique tant aux discussions qu'au vote.*

Fir d'BiergerInnen besser z'informéieren an an dat politescht Liewen vun der Gemeng anzebannen, wäerte mir :

- spëtstens 3 Deeg no jiddwer Gemengerotssëtzung e kuerze Rapport iwwer d'Sëtzung op der Internetsäit vun der Gemeng oder als Dokument am Gemengesekretariat zur Verfügung stellen ;
- regelméisseg an op d'mannst 8-mol pro Joer e „Gemengebulletin“ verëffentlechen, an deem d'Standpunkter vun alle Conseilleren erëmgi ginn;
- op der Internetsäit vun der Gemeng, déi stänneg aktualiséiert gëtt, Rapporten publizéieren iwwer aktuell Dossierer oder Prozeduren déi am Gaang sinn;
- op d'mannst eemol pro Joer eng öffentliche Versammlung organiséieren fir iwwer déi politesch Aktualitéit ze informéieren an doriwwe mat de BiergerInnen ze diskutéieren;
- bei wichtege a wäitreechende Projete Biergerversammlungen organiséieren a regelméisseg Informatiouns- a Sensibiliséierungscampagnen duerchféieren;

- déi auslännesch MatbiergerInnen motivéieren, sech esou vill ewéi méiglech um öffentleche Liewen an der Gemeng ze bedeelegen;
- déi konsultativ Kommissiounen sou vill ewéi méiglech an d’Gestaltung vun der Gemengepolitik abannen. Vill BiergerInnen hu Fachwëssen, kënnen konkret Bedierfnisser ausdrécken, Avisen iwwer Projete formuléieren, Recommandatiounen a Meenungen ofginn. Et wier schued, dëst Potential net ze nutzen;

Duerfir proposéiert de Schäfferot dës berodend Kommissiounen:

1. Commission des Sports et des Loisirs
2. Commission de la Jeunesse
3. Commission de la Famille et des Affaires Sociales
4. Commission des Personnes Agées
5. Commission de l’Egalité des Chances
6. Commission de l’Environnement
7. Commission du Développement Communal
8. Commission du Transport et de la Circulation
9. Commission des Finances
10. Commission des Affaires Culturelles
11. Commission des Bâtisses
12. Commission Juridique (membres juristes)
13. Commission de l’Intégration (Loi du 16 décembre 2008)
14. Commission Scolaire (Loi du 16 février 2009)
15. Commission des Loyers (Loi modifiée du 21 septembre 2006)

De Schäfferot schléit vir, no dëser Sëtzung d’Mandater vun de Kommissiounen öffentlech auszeschreiwen an dann d’Kommissiounen am Respekt mat de virgeschriwwene Regeln ze besetzen. Fir d’Kontinuitéit vun der Aarbecht vun de Kommissiounen ze garantéieren, proposéiert de Schäfferot d’Mandat vun den aktuelle Kommissiounen bis zum Schluss vum Joer ze verlängeren.

## INFRASTRUKTUREN, DÉNGSCHTLEESCHTUNGEN A SOZIALEN ZESUMMENHALT

Ons Gemeng brauch modern Infrastrukturen a muss Déngschtleeschungen ubidden, déi de Bedierfnisser vun de BiergerInnen entsprechen. Duerfir müssen an de nächste Joere gréisser Investitiounen geplangt an ausgefouert ginn.

An deem Sënn wäerte mir:

- e Gesamtkonzept fir en nei ze gestaltend Gemengenhaus entwéckelen. Dat Konzept soll och d’Fro beäntweren, wéi d’Kiercheplaz an Zukunft soll ausgesinn. Eng parteiwwergreifend Aarbechtsgrupp soll d’Richtlinne vun deem Projet ausschaffen. Duerno soll en Architekconcours organiséiert ginn;
- zesumme mam Personal, d’Gemengeverwaltung esou organiséieren dass se:

- ✓ als „Biergeramt“ de „Clienten“ erlaabt, verschiddenst Uleiessen op enger Plaz ze erleedegen , an dat zu publikumsfrëndlechen Öffnungszäiten;
- ✓ als „Berodungsstruktur“de Bierger, esou ewéi de Betriber déi an der Gemeng sinn, bei der Duerchféierung vun hire Projeten zur Säit steet an hinnen all néideg Informatiounen zur Verfügung stellt;
- ✓ als „Mediationsstruktur“ versicht, bei méi klengen Differenzen, zwëschent de Bierger ze vermëttelen. Doduerch kann a ville Fäll fir all déi Bedeelegt Zäit gespuert an onnéidegen lenger verhënnert ginn;

- altersgerecht Wunnenge schafen;
- e modernen Skateboard-a Bikepark schafen;
- „Abenteurklassen“ a „Schiklassen“ am Ausland organiséieren, un deene jidder Schüler a senger Schoulzäit jeeweils eemol deelhuele kann;
- e Konzept ausschaffen an ëmsetzen, fir dass staark benotzten Trottoiren laanscht déi grouss Verkéiersachse schnell an effizient vum Schnéi befreit ginn.
- d’Waasser- a Kanalisatiounstaxen iwwerschaffen a méi gerecht maachen. Jiddwer Stot soll e liewesnoutwennege Grondverbrauch pro Kapp a pro Joer zu engem méi nidderege Präis kréien;
- d’Gemengentaxen 4-mol pro Joer verrechnen an op all Waasserrechnung de Verbrauch vun de 4 leschte Miessungen uginn;
- bei allen Infrastrukturen drop uechten, dass se fir Persoune mat reduzéierter/limitéierter Mobilitéit zougängelech sinn/gemaach ginn
- d’Restauratioun vun der Kierch zu Schëtter weiderféieren;
- d’Infrastrukturen an d’Kapazitéiten vum Service technique ausbauen ;
- d’Gasnetz vervollstännegen;
- D’Idee vun engem Bëschkierfecht ëenersichen.

D’Veräiner spillen eng enorm wichteg Roll fir de sozialen Zesammenhalt vun onser Gemeinschaft. Dofir kënnen si op ons Ënnerstëtzung zielen.Mir wäerten:

- de Veräiner déi noutwenneg Infrastrukturen zur Verfügung stellen;
- d’Sportshaal esou schnell ewéi mëglech réaliséieren;
- de Fussballterrain a Stand setzen ;
- eng „cité jardinière“ an eng Klengdéierenzuchtanlag plangen ;
- d’Iddi vun engem „centre associatif“ verdéiwen;
- déi kulturell, sportlech oder aner gesellschaftlech Aktivitéiten ënnerstëtzen;
- d’Veräinssubsidien, déi säit 6 Joer net ugepasst gi sinn, eropsetzen an duerno op d’mannst un d’Liewenskäschten upassen. E besonnesche Wärt wäerte mir bei der Verdeelung vun de Subsidien op d’Jugendarbecht leeën. E Reglement soll genau Bestëmmungen dofir festleeën;

E wichtegt Uleies ass eis dat d'Jugend an eiser Gemeng aktiv um ëffentleche Liewen deel hëlt. Zesumme mat deene Jonken wäerte mir duerfir:

- sou séier wéi meiglech d'Emsetzung vum Jugendkommunalplang an ugrëff huelen fir iwer dee Wee d'Probleemer an d'Wënsch vun deene Jugendleche gewuer ze gin a mat hinnen zesummen gemeinsam Zieler festzeelen an ëmzesetzen;
- d'Zesummenaarbecht mam Club des Jeunes a mam Jugendhaus a deem Sënn ausbauen.

Mir riichten och eng grouss Opmierksamkeet op d'Wuelbefannen vun onsen eelere Matbierger. Duerfir wäerte mir:

- dat betreit Wunnen doheem mat alle Mëttelen fërderen, déi zur Verfügung stinn;
- altersgerecht Wunnenge schaafe sief et an Zesummenaarbecht mat Nopeschgemengen oder an Eegeregie.

### SCHOUL A FAMILL

Eng absolut Prioritéit vun eis ass eiser Jugend dei bäscht méiglech Viraussetzungen fir eng gudd Ausbildung ze schaafe. Gleichzeitig wëlle mer den Elteren dei neideg Strukturen zur Verfügung stellen fir dat sie hieere Beruf an d'Erzeiung vun hieere Kanner mei einfach ënnert een Hut kréien. Duerfir waerte mir:

- d'Schoul mat alle Mëttel dei eis zur Verfügung stin, beim Emsetzen vum „Plan de Réussite Scolaire“ ennerstëtzen;
- an enger Zesummenaarbecht tëscht Schoul, Elteren a Maison Relais Appuis Cours'en ubidden an och d'Schouléquiper gezielt verstärken fir Kanner dei Schwiereregkeeten hun ze ënnerstëtzen;
- „Erliewnisklassen“ a „Schiklassen“ am Ausland organiséieren, un deenen jidder Schüler a senger Schoulzäit jeeweils eemol deelhuele soll;
- eise Kanner de Sport mei no brengen - se sollen d'Meiglechkeet hun dei verschidde Sportarten kennen ze léieren ier se sech fir eng entscheeden. Daat ganzt mache mir an Zesummenaarbecht mat der Responsableën fir de Schoulsport, der Lasep, der Maison-relais an de Sportvereiner aus eiser Gemeng;
- d'Kapazitéiten vun de Betreuungsinfrastrukturen (crèche, maison relais, cantine) um Schoulcampus „An der Delt“ ausbauen an eis fir eng optimal Zesummenaarbecht tëscht Schoul, Elteren a Maison Relais asetzen;
- d'Offer vun den Aktivitéiten dei am Kader vun der Maison Relais ugebuede gin weider ausbauen, dëst an Zesummenaarbecht mat den Elteren an eisen Duerfvereiner;
- Projet'en ugoen wei deen vun enger Bësch-schoul/Besch-crèche an der freier Natur;
- eng Struktur ariichten fir Kanner dei krank sin an deenen hier Elteren musse schaffe goen ze versueren.

## WIRTSCHAFT, BETRIBER A SOZIALES

Mir wäerten :

- d'Gespréich mat alle Betriber sichen a Projeten a Virschléi mat der néideger Suergfalt a Professionalitéit behandelen;
- all Joer e Ronndeschgespréich mat de Betriber an der Gemeng organiséieren;
- déi am Parc d'Activité Syrdall nach fräi Terrainen fir wirtschaftlech Zwecker notzen an domat Akommesquelle fir d'Gemeng erschléissen an Aarbechtsplaze schafen ;
- d'Zesummenaarbecht mat de Betriber am Gewerbegebitt fërderen fir dass intresséiert Awunner aus der Gemeng do kënne Stagen/Formatiounen maachen an agestallt ginn;
- eng lokal Jobbörse a Kooperatioun mat allen Arbeitgeber aus der Gemeng opbauen.

## KULTUR AN IDENTITÉIT

Iwerall an eisen Dierfer fanne mir nach Spueren vun eiser Geschicht a Kuktur dei ët gëlt ze erhaalen. An och all eis Kënschtler vun haut gëlt ët an hirer Aarbecht ze ënnertëtzten.

Mir wäerten :

- de kulturelle Patrimoine an onser Gemeng erhalen a restauréieren;
- Konschtwierker op ausgewielte Plazen opstellen;
- kulturell Manifestatiounen ënnerstëtzen
- onser Gemeng hir Identitéit verstärken mat ënnert anerem enger neier Gestaltung vum Rond-Point zu Minsbech.

## FINANZEN

D'Realisatioun vun deene Projeten hänkt vun onse finanzielle Mëttelen of, déi mir als « bon père de famille » verwalten wäerten. Mir wëllen d'Suen vun der Allgemengheet sënnvoll uleeën. Mir musse selbstverständlech Prioritéite setzen. Dës hänke vun der Entwécklung vun deenen eenzelne Projeten of a ginn am pluriannuelle Finanzéierungsplang respektiv an deenen eenzelne Budgeten festgeluecht.

Mir wëllen ob jiddefall dervir Suergen dat all Recetten dei der Gemeng zoustinn agezu ginn.

## INTERKOMMUNAL ZUSAMMENARBECHT

### KONTAKTER MAT DE STAATLECHEN INSTANZEN

Mir hunn och Wëlles kuerzfristeg Gespréicher mat den Nopeschgemengen opzehuelen a mat hinnen Relatiounen am Sënn vun enger konstruktiver Zesummenaarbecht am Interessi vun alle Säiten ze sichen.

Dozou gehéiert d'Bedeegung vun onser Gemeng un den interkommunale Syndikater an un anere gemeinsame Projeten, ewéi z.B: AirRegioun

Mir leeën och vill Wäert op gudd'Kontakter mat de staatlechen Instanzen.

Dir Dammen an Dir Hären,

Mir sinn der Meenung, datt mat onsem Programm d'Liewensqualität vun de Bierger an der Gemeng verbessert gëtt an zielen dofir op eng konstruktiv Mataarbecht vun alle Fraktiounen an dësem Gemengerot. Jiddwereen dréit hei seng Verantwortung fir dass mir dat Bescht fir ons Gemeng erreechen.

Ech ka mer virstellen, dass Dir Kommentaren zu dëser Schäfferotserklärung hutt.

Duerfir loossen ech se elo als Dokument verdeelen a bieden lech mer Är Remarquen bis den 10. Dezember mëndlech oder schrëftlech zoukommen ze loossen.

Bei deeër nächster Sëtzung, géife mir déi definitiv Versioun vun der Erklärung dem Gemengerot zum Vote virleeën.

Ech soen lech Merci fir d'Opmierksamkeet.